



# NEWSLETTER

## OLIMPIJSKOG KOMITETA BIH

No. 31, jul/avgust 2025



Poštovani sportisti i sportski radnici,  
Poštovani prijatelji,

Sport je više od takmičenja. On je putovanje kroz napor, vjeru i istrajanost, a svaka medalja samo je svjedočanstvo o nevidljivim trenucima discipline, snage i snova. Upravo tim duhom ispisane su stranice našeg sportskog ljeta, jula i augusta 2025. godine.

Bosna i Hercegovina je na XVIII ljetnom Evropskom omladinskom olimpijskom festivalu u Skoplju doživjela trenutak koji će ostati urezan u našu zajedničku sportsku memoriju. Jedna zlatna, dvije srebrene i jedna bronzana medalja nisu samo brojke u statistici – to su simboli odricanja, nade i uvjerenja da naša mladost može doseći vrh Evrope.

Uspjeh mladog Enhara Mahmića, prvog osvajača zlatne medalje za našu zemlju na EYOF-u, priča je o hrabrosti i viziji, ali i o snazi povjerenja između sportiste i trenera. Njegov mentor, olimpijac i član Izvršnog komiteta OK BiH, Hamza Alić, podsjeća nas da sport nije samo individualni napor, nego zajedničko djelo povjerenja, znanja i podrške.

Grad Sarajevo, vjerni oslonac našeg olimpijskog pokreta, nastavlja graditi temelje za buduće generacije, potvrđujući da sport nije samo arena takmičenja, već i prostor u kojem se oblikuje karakter jednog naroda. Naši sportisti, svojim nastupima na evropskim i svjetskim pozornicama, pokazuju da BiH ima snagu, talent i vrijednosti koje svijet prepoznaje i cjeni.

Ovo izdanje Newsletter-a ne donosi samo vijesti, nego i podsjetnik da je sport put ka zajedništvu. Svaka medalja je ogledalo jednog sistema, svaka pobjeda plod podrške partnera, institucija i cijele zajednice. Bez njih, san bi ostao tek misao; s njima, on postaje stvarnost.

Zato neka nas vodi uvjerenje da gradimo sportsku zajednicu koja ne poznaje granice, koja uči mlade kako da sanjaju, kako da se bore i kako da u pobjedi ostanu skromni.

Hvala vam što vjerujete u snagu sporta i što zajedno ispisujemo stranice uspjeha koje će inspirisati generacije.

Akademik prof. dr Izet Rađo  
Predsjednik Olimpijskog komiteta Bosne i Hercegovine

## GRAD SARAJEVO NASTAVLJA SARADNJU SA OK BIH KAO KROVНОM INSTITUCIJOM BH. OLIMPIZMA



Predsjednik Olimpijskog komiteta BiH, akademik prof. dr. Izet Rađo, i generalni sekretar doc. dr. Said Fazlagić, sastali su se u Vijećnici sa gradonačelnikom Sarajeva Samirom Avdićem.

Bila je ovo prilika i da čelnici OK BiH upute Gradonačelniku čestitke povodom imenovanja i poželes uspješan mandat.

U fokusu razgovora bile su tri ključne teme:

- YOG 2032 – Zimske olimpijske igre mladih: nastavak olimpijske inicijative i očuvanje nasljeđa;
- Obilježavanje ZOI '84: kao alat za kreiranje uspješne olimpijske budućnosti;
- Razvoj „Olimpijskog Sarajeva 21. stoljeća“: pozicioniranje Sarajeva kao modernog olimpijskog grada kroz brojne programe za mlađe i sve građane, te kao budući olimpijski centar regije i svijeta;
- Jačanje sportske diplomacije.

Nastavljamo zajedničkim koracima ka unaprjeđenju i dobrobiti sportskog sistema Bosne i Hercegovine, ali i cijelokupnog bosanskohercegovačkog društva.

## OK BIH I ATLETSKI SAVEZ BIH POTPISALI UGOVOR ZA RAZVOJ DRŽAVNE SPORTSKE STRUKTURE



U prostorijama Olimpijskog komiteta Bosne i Hercegovine u Sarajevu potpisani je Ugovor za projekt DNSS (Development of National Sport System) sa Atletskim savezom BiH. Atletskom savezu BiH za realizaciju ovog projekta obezbjeđeno je 40.000 američkih dolara. Projekat "Development of National Sport System" je složen i važan program čiji je cilj omogućiti NOK-ovima da razviju i ojačaju trenažne strukture sportskih saveza i srodnih sistema postavljanjem srednjeročnog ili dugoročnog akcionog plana. Kroz projekat se uspostavlja sistem licenciranja trenera i sudija.

"Ovom saradnjom će biti omogućene edukacije koje će podići svijest i kvalitet sporta u BiH. Predviđeno je mnogo edukacija, da naši atletičari dobiju vrhunske trenere i sudije, te da unaprijedimo atletski opus. Na taj način možemo podići nivo sporta u našoj zemlji", kazao je Duško Ivičić, predsjednik Atletskog saveza BiH.

"Ovim projektom šaljemo jasnu poruku da je razvoj sportskih struktura prioritet za Olimpijski komitet BiH", kazao je predsjednik OK BiH akademik prof.dr. Izet Rađo.

Pročitajte više na [OVOM LINKU](#), a video potpisivanja pogledajte [OVDJE](#).

## UZ PODRŠKU OK BIH, LEJLA NJEMČEVIĆ IMA PRILIKU ZA PRVU SPECIJALIZACIJU U OBLASTI SPORTSKOG PRAVA

Naša najbolja biciklistkinja, Lejla Njemčević, je u prostorijama Olimpijskog komiteta Bosne i Hercegovine u Sarajevu potpisala ugovor o dodjeli "Athlete Education Grant", Olimpijske solidarnosti, koja je nezavisno tijelo Međunarodnog olimpijskog komiteta, odgovorno edukaciju i ulaganje u najbolje sportiste. Grant je u ime OK BiH sa Lejom Njemčević potpisao predsjednik Olimpijskog komiteta BiH, akademik prof. dr. Izet Rađo.



Grant u vrijednosti od 10.000 USD omogućiće Lejli da pohađa magistarski studij iz oblasti sportskog prava na Institutu za sportsko pravo u Cirihi. "Ponosni smo što možemo podržati Lejlu Njemčević, ne samo kao vrhunsku sportistkinju već i kao osobu koja nastavlja graditi svoje znanje. Ovaj grant je ulaganje u budućnost sporta, gdje naši šampioni postaju lideri i izvan sportskih terena", istakao je prof. dr. Rađo.

Njemčević je istakla kako je ovo jedinstvena prilika za specijalizaciju u sportskom pravu. "Nakon završetka Pravnog fakulteta, ovo će biti prva specijalizacija u sportskom pravu u BiH, podržana od MOK-a i OK BiH." Više na linku [OVDJE](#).

## PROGRAM PLUS ZA MLADE

U prostorijama Olimpijskog komiteta Bosne i Hercegovine u Sarajevu potpisani je ugovor za „Program plus za mlade nade“, koji se realizuje u sklopu programa razvoja mlađih sportista.

Ovaj program omogućava NOK-ovima identifikaciju perspektivnih sportista koji bi trebali imati svjetlu sportsku i olimpijsku budućnost.

Ukupan budžet od 25.000 USD podijeljen je na 13 sportista.



Predsjednik Olimpijskog komiteta Bosne i Hercegovine, akademik prof. dr Izet Rađo, istakao je kako se šalje važna poruka mladim i talentovanim sportistima širom Bosne i Hercegovine. "Prepoznajemo vaš trud, vjerujemo u vaš potencijal i stojimo uz vas na putu ka najvećim sportskim arenama. Ovaj program je konkretna podrška onima koji su budućnost bh. sporta, a naš cilj je da im kroz kvalitetne pripreme, takmičenja i kampove omogućimo uslove kakve zaslužuju. Ovi mladi sportisti nisu samo nada, već i ponos naše zemlje, a Olimpijski komitet BiH će uvek biti njihov partner na putu ka vrhunskim rezultatima."

Više na [OVOM LINKU](#), a video potpisivanja pogledajte [OVDJE](#).

## NAPREDNI KURSEVI MENADŽMENTA U SPORTU 2025 - MARKETING



U multimedijalnoj sali Olimpijskog komiteta Bosne i Hercegovine u julu mjesecu je održan je 5 modul Naprednih kurseva menadžmenta u sportu 2025 - marketing.

Na kursu je učestvovalo 17 predstavnika sportskih saveza BiH, koji su drugog dana modula imali priliku slušati iskustva i savjete uvaženog rektora Sveučilišta u Mostaru, akademika prof. dr. Zorana Tomića. Profesor Tomić je na interaktivan i zanimljiv način predstavio komunikaciju kao temelju uspjeha u sportu.

Učesnicima Modula svoja iskustva i znanje prenio je i MSc Ivan Tomić, a fokus je bila "Sportska diplomacija".

Program "Naprednih kurseva menadžmenta u sportu" je osmišljen od strane Međunarodnog olimpijskog komiteta, a predstavlja vrhunsku teoretsko-praktičnu platformu za unapređenje rada sportskih organizacija.

Naredni modul je Organizacija sportskih takmičenja u septembru. Po završetku, kandidati dobijaju prestižnu diplomu Međunarodnog olimpijskog komiteta — vrijedan dokaz o kompetencijama za rad u sportskom sektoru širom svijeta.

Video petog modula pogledajte [OVDJE](#).



## SASTANAK MARKETING KOMISIJE EVROPSKIH OLIMPIJSKIH KOMITETA



Marketing komisija Evropskih olimpijskih komiteta održala je sastanak 22. avgusta u Frankfurtu. Fokus sastanka bili su EYOF (Evropski omladinski olimpijski festival) i Evropske igre kao najvažniji marketinški proizvodi EOK-a. Sastanku Komisije je prisustvovao doc. dr. Said Fazlagić, generalni sekretar OK BiH, član Marketing komisije EOK-a. Posebna pažnja posvećena je pripremama za takmičenja i odabiru najboljeg partnera za rad na velikim sportskim događajima.

Ovaj sastanak je važan korak u jačanju i promociji sportskih događaja Evrope!

## SARADNJA OLIMPIJSKOG KOMITETA BOSNE I HERCEGOVINE I DENTAL CENTRA MARKOVIĆ IZ SARAJEVA



Olimpijski komitet Bosne i Hercegovine i Dental Centar Marković iz Sarajeva potpisali su sporazum o saradnji. Ovom saradnjom, korisnici besplatnih stomatoloških usluga su sportisti i stipendisti Olimpijskog komiteta BiH, odnosno osobe za koje je izdata potvrda od strane Olimpijskog komiteta BiH.

Besplatne usluge obuhvataju preglede, liječenje, hitne intervencije i druge osnovne stomatološke usluge. Za sve

protetske usluge, ortodonciju, implantologiju i estetsku stomatologiju, odobrava se rabat od 50%. Ugovor su u ime OK BiH potpisali generalni sekretar, doc dr Said Fazlagić, dok je u ime Dental Centra Marković, njegov osnivač Davor Marković.

Ova saradnja jača podršku sportistima i podstiče zdravlje u olimpijskom timu. Video potpisivanja pogledajte [OVDJE](#).

# SPORTSKI SAVEZI BOSNE I HERCEGOVINE

## RAGBI SAVEZ BIH | KAMP ZA ŽENSKU SELEKCIJU U RAGBIJU UZ PODRŠKU OK BIH I PROGRAMA TEAM SUPPORT GRANT



U periodu 3. do 6. jula 2025. godine održan je kamp za žensku selekciju u ragbiju 7 u organizaciji Ragbi saveza BiH, uz podršku OK BiH i programa Team Support Grant za razvoj sportskih selekcija.

Tokom četverodnevnog rada, mlade ragbijašice iz Zenice, Mostara i Tuzle imale su priliku da razvijaju svoje vještine i grade timski duh. Olimpijski komitet BiH i Ragbi savez BiH ranije su potpisali Ugovor podrške za razvoj ženskog ragbija putem fonda Olimpijske solidarnosti.

Ugovor je vrijedan 100.000 USD i ima za cilj jačanje ženske reprezentacije, te pripremu za Olimpijske igre Brisbane 2032. Ovo je veliki korak naprijed za razvoj ženskog sporta i ragbija u Bosni i Hercegovini!

## TEHNIČKO-PRIPREMNI KAMP ZA ŽENSKU SELEKCIJU I SELEKCIJU U18



U periodu od 11. do 16. avgusta 2025. godine održan je tehničko-pripremni kamp za žensku selekciju i selekciju U18 Bosne i Hercegovine na lokalitetu Boračkog jezera. U sklopu 6 intenzivnih dana mlađi ragbijaši imali su priliku da pod vodstvom iskusnih trenera, a na čelu sa Uzunović Damirom unaprijede svoje vještine i znanja o ragbiju. Također, ovo je bila prilika za mlađe trenere "pripravnike" koji su dobili priliku da rade sa mlađim kategorijama jer su na kampu boravile i omladinske selekcije Ragbi kluba Čelik iz Zenice. Ovo je sjajna prilika da naši mlađi igrači unaprijede vještine ragbi igre, a ujedno grade timski duh i pozitivne vrijednosti.

Realizacija kampa podržana je od strane Vlade FBIH, Ministarstva za obrazovanje nauku, kulturu i sport ZDK, BH Telecom-a, Olimpijskog komiteta BiH, Grada Zenica.

## TRIATLON SAVEZ BIH | GREEN LAKE TRIATHLON 2025 – DRŽAVNO PRVENSTVO U OLIMPIJSKOM TRIATLONU



Na startu se našlo 70 takmičara iz Austrije, Švedske, Saudijske Arabije, Hrvatske i Bosne i Hercegovine. Oni su se okušali na standardnim distancama olimpijskog triatlona – 1500 m plivanja, 40 km biciklizma i 10 km trčanja – dok su sprint takmičari savladali upola kraću dionicu.

**Pobjednici olimpijskog triatlona:**

**Muškarci:** 1. Belmin Godinjak (TK Tri G), 2. Amir Nakić (TK 5E2031), 3. Miljan Bojić (RMC TK Banja Luka).

Državno prvenstvo Bosne i Hercegovine u olimpijskom triatlonu održano je u prelijepom ambijentu Lisičića kod Konjica, na obalama Jablaničkog jezera. Takmičenje je i ove godine nosilo naziv Green Lake Triathlon 2025, a posebnu draž mu je dao bogat program. Uz Državno prvenstvo organizovana je i sprint trka te štafeta, čime je događaj dodatno obogaćen i približen svim ljubiteljima triatlona.



**Žene:** 1. Andjela Talić (TK Rama), 2. Jasmina Mehmedović (TK 5E2031). Sprint triatlon donio je pobjede Ibrahimu Alzaidiju i Almi Žunić, dok su u štafetnoj utrci najbolji bili Ivor Udovčić, Anesa Agović i Haris Kovačević.

Organizatori ističu da su posebno ponosni na činjenicu da je ovogodišnje izdanje okupilo i sportiste iz inostranstva, što doprinosi međunarodnom značaju događaja. „Zahvalni smo svima koji



su podržali Green Lake Triathlon 2025 – Gradu Konjicu na čelu s gradonačelnikom Osmanom Ćatićem, HNK, policiji i hitnoj pomoći Konjic, Sportskom društvu Lisičići, domaćinima iz Lisičića, te našim vrijednim volonterima iz Udruženja Trčanje i To. Bez njih ovaj događaj ne bi bio moguć“, poručio je Jasmin Harbinja, predsjednik Organizacionog odbora i kluba TK Feniks, uz čiju podršku i Triatlon i pentatlon saveza BiH je uspješno održano Prvenstvo.



## KICKBOXING SAVEZ BIH | PRIPREME REPREZENTACIJE BOSNE I HERCEGOVINE ZA EVROPSKO PRVENSTVO



**Kickboxing reprezentacija Bosne i Hercegovine i ove godine pokazuje posvećenost i ozbiljnost u radu, završivši pripreme za predstojeće Evropsko prvenstvo za kadete i juniore, koje će se održati u Italiji (Jesolo Lido) od 12. do 20. septembra 2025. godine.**

Uz ključnu podršku partnera i institucija, BH Telecoma i Vlade Federacije BiH, pripreme, kao i sam odlazak na Prvenstvo, znatno su olakšani. Na taj način osiguran je kontinuitet priprema i mogućnost za kvalitetnije predstavljanje bh. sporta na međunarodnoj sceni.

Najbolji kadeti i juniori su se od 15. do 23. avgusta 2025. godine pripremali na dvije lokacije shodno svojim disciplinama. Pripreme za ringovne discipline održane su na Palama, a predvodio ih je selektor reprezentacije Milan Vitković sa svojim asistentima Elvedinom Dubravcem, Nikolom Đurićem i Esmirom Eskićem. Pripreme za tatami discipline održane su u Bihaću, uz predvođenje glavnog trenera reprezentacije za tatami, Senada Ćatića. Asistenti su bili Mustafa Zulić, Bećo Durdžić i Veldin Halilović.

Pripreme imaju poseban značaj za ovaj uzrast, zbog novih izazova i prilika za ostvarivanje vrhunskih rezultata. Želimo puno uspjeha našim sportskim ambasadorima Bosne i Hercegovine.



## SAVEZ DIZAČA TEGOVA BIH | ANDRANIK KARAPETYAN

“Naš najbolji dizač tegova, Andranik Karapetyan, je u toku priprema za Svjetsko prvenstvo, gdje je favorit u disciplini trzaj.

Sa nestrpljenjem očekujemo turnir Blue Swords u Meisenu, gdje će, u svom drugom nastupu za BiH, Andranik pokazati svoju formu, a onda nastavak priprema sve do oktobra i Svjetskog prvenstva”, izjavili su iz Saveza dizača tegova Bosne i Hercegovine.



## EUROPSKO PRVENSTVO U15/U17 2025



Luka Madunić, bh. olimpijska nada, nakon izvanrednog nastupa na Alpe Adria u Veneciji, gdje je osvojio bronzanu medalju, pobijedivši najboljeg Austrijanca, Mađara, Italijana i Slovenca, u konkurenciji do 17 godina je imao svoj prvi nastup na Europskom prvenstvu. Luka Madunić je uspješno završio svoj debi na Europskom prvenstvu U17 u Madridu. Luka je, za 1 kg, poboljšao državni rekord u izbačaju, koji je postavio na Alpe Adria International u Veneciji. Sa željom da nastavi formu i podigne letvicu, u nadi za skoro osvajanje medalja na europskim prvenstvima.

Osim Luke Madunića, predvođenog trenerom Harisom Durakom, BiH je imala još 2 predstavnika na EP u Madridu. Enisa Mašić, članica EWF (Europske federacije) Coaching&Research komiteta je bila sudija kao i Nedim Mašić, Vicepresident Europske federacije (EWF) i predsjednik Antidoping Komisije EWF-a, koji je bio član žirija.

## BOSNA I HERCEGOVINA U POHODU NA 9 MEDALJA NA EP 2026



Osim Andranika Karapetyana i Ossame Yassira Hamdana, za Bosnu i Hercegovinu će naredne godine nastupiti i dvostruki olimpijski osvajač medalja za kojeg su pregovori u toku.

Savez dizača tegova BiH od trojice navedenih takmičara očekuje devet medalja.

## RUKOMETNI SAVEZ BIH | ALEM HADŽIĆ | IZ BANOVIĆA DO EVROPSKIH RUKOMETNIH VISINA

Alem Hadžić, rođen 15.06.2007. godine u Tuzli, svoje prve rukometne korake napravio je u rodnim Banovićima, gdje je od 2014. do 2018. godine nastupao za omladinski rukometni klub Rudar Banovići. Nakon fuzije kluba sa RK Konjuh Živinice, nastavlja svoj razvoj u ovom uspješnom rukometnom kolektivu.



S ekipom Konjuha bilježi izvanredne uspjehe – trostruki je uzastopni prvak BiH u kadetskoj konkurenciji, a dva puta je proglašen MVP-jem završnice državnog prvenstva. Sa svega 14 i po godina debitovao je za prvi tim RK Konjuh, čime je najavio veliku karijeru.

Alem je kapiten kadetske reprezentacije BiH, s kojom je 2023. godine osvojio B diviziju Evropskog prvenstva u Slovačkoj i tako osigurao direktni plasman na Evropsko prvenstvo 2026. godine. Na tom takmičenju proglašen je i za najkorisnijeg igrača – MVP.

Sa tačno 16 godina potpisuje ugovor sa sjevernomakedonskim klubom Eurofarm Pelister II, a već naredne, 2024. godine prelazi u prvi tim Eurofarm Pelistera, potpisavši četverogodišnji ugovor. Sa 17 godina nastupa u prestižnoj EHF Ligi šampiona u kojoj je odigrao šest utakmica i postigao šest golova.

U sezoni 2024/25. osvaja titulu prvaka Sjeverne Makedonije, a uporedno nastupa i u inauguralom izdanju omladinske Lige šampiona – takmičenju koje se prvi put održava u ovom formatu. U grupnoj fazi proglašen je za MVP-a, a svoj tim predvodi do Final Four turnira u Kelnu. Na završnici turnira u Kelnu postaje najbolji strijelac omladinske Lige šampiona sa impresivnih 40 golova u četiri utakmice.

Alem Hadžić je jedan od najsvjetlijih primjera posvećenosti, talenta i uspjeha bh. sportaša na međunarodnoj sportskoj sceni, te s pravom važi za jednog od najvećih rukometnih potencijala naše zemlje.



## RUKOMETNI SAVEZ BIH | LUKA BRANKOVIĆ NAJMLAĐI HRONIČAR SPORTSKIH USPJEHA I PRIMJER SVESTRANOSTI MLADIH SPORTISTA



Priča o Luki Brankoviću iz Banjaluke vraća vjeru u prave vrijednosti sporta, posvećenosti i društvene odgovornosti. Ovaj dvanaestogodišnji dječak ne samo da je kapiten rukometne ekipе u svojoj generaciji koja je trećeplasirana ekipа u Bosni i Hercegovini, već je i jedan od najmlađih sportskih fotografa u regionu – a i šire. Luka je najmlađi akreditovani fotograf od strane Svjetske kuće rukometa IHF i fotografisao je utakmice na Svjetskom prvenstvu u rukometu koje se održavalo u Zagrebu, gdje je imao priliku da fotografise svoje rukometne idole i druži se s njima. Svojim profesionalnim pristupom, kvalitetom fotografija i ponašanjem na terenu, Lukaj je osvojio srca i sportista i navijača. Njegove fotografije nisu prošle nezapaženo ni kod medija – o njemu su pisali brojni portalni i novinski, a čak je i RTL televizija snimila prilog o njegovom hobiju i načinu na koji spaja sportsku strast s umjetničkim izražavanjem.

Pored toga što je službeni fotograf Fudbalskog kluba Borac, za koji dokumentuje utakmice (Liga BiH i Liga konferencija), Luka aktivno prati brojna sportska dešavanja širom BiH i van nje. Njegove fotografije krase stranice sportskih portala, društvene mreže klubova i brojna sportska izdanja. Ono što Luku čini posebnim nije samo njegova ljubav prema fotografiji, već i njegov karakter. Nedavno je organizovao humanitarnu akciju, tokom koje je skupio novac slikajući učenike svoje škole, a prikupljena sredstva donirao. Pola prikupljenih sredstava je donirao za pomoć sugrađaninu Sergeju Stuparu za troškove liječenja, a drugu polovicu je poklonio svojoj školi za kupovanje sportskih rezervnih dijelova i lopti za fiskulturnu salu. Luka je tako pokazao da sportista može biti i društveno odgovoran član zajednice, neko ko zna dati sebe i van terena.

Luka se ne bavi samo foto nego i snimanjem video materijala. Ove godine je snimio i dokumentarni film o svojoj školi, u kojem je na veoma zreo način predstavio istoriju ustanove, bivše i sadašnje učitelje, kao i brojne zanimljive detalje iz prošlosti koje bi vrijeme možda zaboravilo. Video je dostupan na linku [OVDJE](#).

Uprkos brojnim obavezama, Luka ne zapostavlja školu, drugare i treninge. Njegova svestranost, ljubav prema sportu i fotografiji, kao i posvećenost svemu što radi, prepoznata je i od strane međunarodnih institucija.

Luka Branković je živi dokaz da godine nisu prepreka za velike ideje, odgovornost i uspjeh. On je uzor svojoj generaciji i pokazatelj da se sport, kreativnost i humanost mogu savršeno spojiti. U njemu ne raste samo sportista ili fotograf, već ličnost koja već sada ostavlja trag u sportskoj zajednici BiH.

# BIH TEAM • EYOF SKOPLJE 2025

## ISTORIJSKI REZULTATI BOSNE I HERCEGOVINE NA EVROPSKOM OMLADINSKOM OLIMPIJSKOM FESTIVALU SKOPLJE 2025!

Na 18. izdanju ljetnog EYOF-a 2025 u Skoplju, tim Bosne i Hercegovine je učestvovao sa ukupno 34 sportista i 13 oficijela. U periodu proteklih 30 godina od prvog učešća na ovom takmičenju za mlade sportiste Evrope do 18 godina, koje se 1995. godine održalo u Velikoj Britaniji, bosanskohercegovački tim je ove godine ostvario najbolji rezultat osvojivši po prvi put četiri medalje - jednu zlatnu, dvije srebrene i jednu bronzanu medalju.

Tim je zvanično predstavljen u prostorijama OK BiH, 16. jula, a kompletan sastav bh. delegacije možete pročitati na linku [OVDJE](#). Takođe, video predstavljanja bh. tima možete pogledati na [OVOM LINKU](#).

## MEDALJE ZA BOSNU I HERCEGOVINU SU OSVOJILI:



## AMBASADOR BIH U SJEVERNOJ MAKEDONIJI, NJ.E. DRAGAN JAĆIMOVIĆ POSJETIO BIH TIM EYOF SKOPLJE 2025



Njegova ekselencija, ambasador Bosne i Hercegovine u Sjevernoj Makedoniji, Dragan Jaćimović, posjetio je bosanskohercegovački tim na EYOF-u Skoplje 2025!

Zajedno sa predsjednikom Olimpijskog komiteta BiH, akademikom prof. dr. Izetom Rađom, i generalnim sekretarom, doc. dr. Saidom Fazlagićem, poželjeli su našim sportistima puno uspjeha na ovom takmičenju na kojem je zabilježen rekordni broj predstavnika BiH – najviše do sada na ljetnjom EYOF-u.

Ambasador Jaćimović je istakao: "Bosna i Hercegovina je mala zemlja, ali smo veliki kao ljudi i kao zemlja. Lijepo je kada dobijete medalju, ali niko ne zna koliko je teškog rada iza tog uspjeha."

U izuzetno pozitivnoj atmosferi razgovarali su sa sportistima i trenerima, razmijenili iskustva i podstakli našu mladež na dalje uspjehe! Video posjete pogledajte [OVDJE](#).



## CEREMONIJE OTVARANJA I ZATVARANJA

Ceremonije otvaranja i zatvaranja EYOF-a Skoplje 2025 održane su u sportskom centru Jane Sandanski. Na ceremoniji otvaranja ([VIDEO](#)) zastavu Bosne i Hercegovine su nosili Zakira Pušina (streljaštvo) i Nino Šeremet (taekwondo), dok su na ceremoniji zatvaranja zastavu nosili sportisti koji su ostvarili najbolji rezultat u muškoj i ženskoj konkurenciji - Zerina Vrabac (plivanje) i Enhar Mahmić (atletika).



## PRVA ZLATNA MEDALJA NA EYOF-U: USPJEH MAHMIĆA I TRENERA ALIĆA OTKRIVA BRUTALNU ISTINU, IMAMO ŠAMPIONE, ALI NEMAMO SPORTSKI SISTEM



**Uspjeh Mahmića i trenera Hamze Alića otkriva brutalnu istinu: imamo šampione, ali nemamo sportski sistem. Do kada?**

Prvi takmičarski dan na EYOF-u u Skoplju, naš mladi atletičar Enhar Mahmić u konkurenciji 15 najboljih mlađih bacača kugle u Evropi je osvojio prvu zlatnu medalju za Bosnu i Hercegovinu sa rezultatom 19,34m.

Zlatna medalja mладог шampiona Enhara Mahmića, pod vođstvom trenera Hamze Alića, nije samo sportski rezultat, to je ogledalo talenta koji mlađi ljudi u Bosni i Hercegovini nose u sebi. I svaki put kada se pojavi ovakvo ime, podsjeti nas na jedno: potencijala ima, ali sistemske podrške nema.

Njihov uspjeh je individualna pobjeda talenta, rada i odričanja, a ne produkt sportskog sistema. Jer taj sistem u BiH – realno – ne postoji. Kada nakon EYOF-a, Balkanskog prvenstva ili svjetskih juniorskih takmičenja gledamo medalje, svi se dičimo, a samo rijetki se zapitaju: gdje su ti sportisti za 5, 10 godina? Odgovor je bolan, prečesto u drugim državama, pod tuđim zastavama, tražeći uslove koje ovdje nisu dobili. Zato imamo tri, najviše pet olimpijaca na olimpijadi. Zato imamo sportiste bez osnovnih uslova za rad, bez stručne podrške, sa roditeljima koji su jedini „sistem“ koji ih gura naprijed. Sport je ozbiljna djelatnost, to je odgojna, zdravstvena, obrazovna i ekonomска grana, a kod nas je prečesto jeftina karta za političku promociju.

Sportistima treba jasan kriterijski model finansiranja, rezultati, rad i kontinuitet. Javna sredstva treba da slijede vrijednost koju sport donosi – ne da budu politička podjela, već uslovi za razvoj i napredak. Čast izuzecima. Ima ih. Ljudi koji vide širu sliku, koji žele promjene i ne pristaju na prosjek. Enhар Mahmić je znak nade i podsjetnik: uspjeh pojedinaca je moguć uprkos sistemu, ali društvo i sportovi napreduju kada je sistem saveznik.

Vrijeme je da pređemo iz mode „spasi talentovanog pojedinca“ u izgradnju sportske piramide, gdje je svaki šampion kruna sistema.

dr. Izet Rađo, predsjednik OK BiH

## AMEL TUKA POKAZAO VRHUNSKU FORMU

Na atletskom mitingu u Lignanu, naš najbolji atletičar i olimpijac Amel Tuka istrčao je 800 metara za 1:44.91 – svoj najbolji rezultat sezone!

Ovaj rezultat mu je donio treće mjesto, s time da je za prvo mjesto zaostao samo dvije desetinke. "Nakon 2021. i Olimpijade u Tokiju, konačno 1:44.0 ponovo. Ovaj osjećaj je nemjerljiv. Zahvalan sam svima na podršci i strpljenju. Idemo dalje!"

Čestitke Amelu, treneru, klubu i Atletskom savezu BiH.



## PRVENSTVO BALKANA: MEDALJA ZA AMELA TUKU, DOBRI NASTUPI BH. ATLETIČARA



Reprezentacija Bosne i Hercegovine završila je nastup na Prvenstvu Balkana, na kome su učestvovale 22 zemlje, gdje su bh. atletičari ostvarili zapažene rezultate i donijeli vrijedne bodove državnom timu.

Najuspješniji predstavnik bio je Amel Tuka, koji je u trci na 800 metara ostvario rezultat 1:47,00 i zauzeo 3. mjesto, čime je Bosni i Hercegovini donio medalju na ovom takmičenju.

Pored njega, odličan nastup imao je i Mesud Pezer, koji je u disciplini bacanje kugle zabilježio hitac od 19.69 metara i zauzeo 4. mjesto.

U nastavku su svi ostvareni rezultati naših atletičara:

Amel Tuka – 800 m: 1:47,00, 3. mjesto; Mesud Pezer – kugla: 19.69 m, 4. mjesto; Luka Ivičić – desetoboj: 6252 bodova, 5. mjesto; Maša Garić – 400 m prepone: 58.40, 6. mjesto; Marko Šuković – skok uvis: 2.11 m, 7. mjesto; Uroš Gutić – 3000 m: 8:41.77, 7. mjesto; Uroš Gutić – 5000 m: 15:21.50, 9. mjesto; Sara Lučić – skok uvis: 1.70 m, 10. mjesto; Bakir Musić – 200 m: 21.17, 11. mjesto; Mahir Kurtalić – 110 m prepone: 14.58, 11. mjesto; Emina Omanović – skok udalj: 5.75 m, 13. mjesto; Ermin Beganić – 400 m: 49.12, 15. mjesto; Edhem Vikalo – 100 m: 10.88, 16. mjesto; Ermin Beganić – 200 m: 22.39, 19. mjesto.

"Naši atletičari pokazali su borbenost i dali maksimum u konkurenciji najboljih takmičara Balkana. Medalja Amela Tuke, te nekoliko plasmana u sam vrh potvrđuju kvalitet bh. atletike i motiv su za dalji rad i napredak", izjavili su iz Atletkog saveza Bosne i Hercegovine.

## LEJLA NJEMČEVIĆ OSVOJILA DRUGO MJESTO NA UTRCI U ŠVEDSKOJ



Lejla Njemčević osvojila je drugo mjesto na utrci u Švedskoj!

Najbolja bh. biciklistkinja, Lejla Njemčević na utci Cykelvasan – Vasaloppet u Švedskoj zauzela je 2. mjesto i ponosno predstavljala Bosnu i Hercegovinu!

“Cykelvasan je jedna od mojih najdražih utrka. Iako mi ravničarska staza ne odgovara, zadovoljna sam drugim mjestom. Ovo je priprema za Svjetsko prvenstvo u Švicarskoj 6. septembra.“

Lejla čestitke tebi, timu i Biciklističkom savezu BiH.

## BOSANSKOHERCEGOVAČKI SPRINTER BAKIR MUŠIĆ OSVOJIO PETO MJESTO NA EVROPSKOM PRVENSTVU



Devetnaestogodišnji Bakir Mušić izuzetno je predstavio Bosnu i Hercegovinu na Evropskom atletskom prvenstvu do 20 godina u finskom Tampere-u, osvojivši peto mjesto u finalu trke na 200 metara!

U trci je zabilježio vrijeme od 21.52 sekunde.

U polufinalu je s 21.12 sekundi zauzeo treće mjesto u svojoj trci, osiguravši direktni plasman u finale među 16 najboljih. Bakir je dokazao da su talent i trud itekako važni, a ovo je samo početak njegovog atletskog putovanja na međunarodnoj sportskoj sceni. Čestitke Bakiru, treneru, klubu i Atletskom savezu BiH na sjajnom uspjehu!

## TEA KOVAČEVIĆ - DUPLA KRUNA U KRAKOVU



Petnaestogodišnja bh. teniska reprezentativka Tea Kovačević osvojila je turnir J100 ITF u Krakowu – i to u obje konkurenkcije! U singlu je u finalu savladala Izraelku Ofir Manhard rezultatom 2:0 (6:4, 6:1), a na putu do titule zabilježila je i pobjede protiv teniserki iz Poljske i Slovačke.

U dublu, zajedno s Ukrajinkom Sofijom Bielinski, trijumfovala je protiv slovačke kombinacije Barhacova/Cinkanicova (7:5, 6:2).

Ovim uspjehom Tea je ostvarila najbolji plasman karijere – trenutno je 177. juniorka svijeta, a samo 14 djevojčica rođenih 2010. godine nalazi se ispred nje na ITF listi. Čestitke Tei, njenom timu i Teniskom savezu BiH.

## VATERPOLO KADETI NA EVROPSKOM POSTOLJU



Mladi vaterpolisti Bosne i Hercegovine (BiH) osvojili su bronzanu medalju na Evropskom prvenstvu Divizije 1 u Ljubljani! Nakon napete utakmice i penala, naši heroji su pokazali čeličnu volju i borbeni duh.

Čestitke mladim kadetima, njihovom treneru i Vaterpolo savezu BiH na ovom izvanrednom uspjehu! Ovi mladi sportisti žele dokazati da BiH ima vaterpolsku budućnost. Njihov put kroz Diviziju 1 bio je više od takmičenja; bio je to korak ka višem nivou, ka eliti evropskog vaterpola.

BiH je dokazala da može imati svoje mjesto u vrhu evropskog vaterpola.

## TRI MEDALJE ZA BOKSERKE IZ BIH



Reprezentativke Bosne i Hercegovine, osvojile su medalje na Evropskom prvenstvu u olimpijskom boksu u Srbiji (Novi Pazar).

Lidija Šošo je osvojila srebrnu medalju u kategoriji -80 kg.

Ajna Halilović i Asija Turković su osvojile bronzane medalje u kategorijama -57 kg i -63 kg.

One su članice B.K. "Pit Bull Leotar" iz Trebinja i Kluba borilačkih sportova „PANTER“ iz Sarajeva.

Čestitke takmičarkama, trenerima, klubovima, te Bokserskom savezu BiH.

## REPREZENTACIJA BOSNE I HERCEGOVINE U SJEDEĆOJ ODBOJCI PONOVO JE PRVAK EVROPE!



U finalu Evropskog prvenstva u mađarskom Gyor-u, naši zlatni momci savladali su Njemačku sa 3:0 (25:23, 25:22, 25:18) i tako stigli do 12. evropskog zlata, trećeg uzastopnog nakon Caorlea i Kemera! Bez izgubljenog seta do titule!

Mirzet Duran (19 poena) i Safet Alibašić (18) blistali u finalu, ali cijeli tim zaslužuje naklon do poda.

Čestitke našim momcima i kompletnom timu koji stoji iza njih! Legenda se nastavlja...

Foto: Paravolley Europe/Dino Šečić

## BOSANSKOHERCEGOVAČKI VITEZOVI SJEDEĆE ODBOJKE – PRIČA O PONOSU, SNAZI I LEGENDAMA

Kad govorimo o velikim sportskim pričama, teško je nadmašiti put bosanskohercegovačkih reprezentativaca u sjedećoj odbojci. Pet heroja – kapiten Sabahudin Delalić, Ismet Godinjak, Asim Medić, Adnan Manko i Dževad Hamzić – nisu samo sportisti. Oni su simboli borbe, predanosti i uspjeha na svjetskoj sceni.

Ovi momci su vodili svoju reprezentaciju decenijama. Njihova kolekcija od 7 paraolimpijskih medalja govori sve – ali veće od medalja je naslijede koje su ostavili u srcima ljudi širom Evrope, svijeta i naše domovine.



Sabahudin Delalić, kapiten s dušom lidera, vodio je tim kroz sedam Paraolimpijskih igara: Sidnej, Atina, Peking, London, Rio, Tokio i Pariz. Dvije zlatne medalje, pet srebrenih i jedna bronzana – to je priča koju rijetko koji sportista može ispričati.

Ismet Godinjak – neprobojna tvrđava, Asim Medić – tiha snaga, Adnan Manko – odbojkaška legenda, Dževad Hamzić – pouzdan oslonac. Svaki od njih je ostavio neizbrisiv pečat!

Zahvaljujući njima, Bosna i Hercegovina je sinonim za vrhunsku sjedeću odbojku. Njihova priča inspiracija je za sve generacije – ne samo sportiste, već one koji vjeruju u moć zajedništva i sporta bez granica.

Kapiten Delalić: "Biti dio ovog tima značilo je više od sporta. Bilo je to bratstvo, ponos i odgovornost prema zemlji i ljudima."

## DVIJE SREBRNE MEDALJE ZA BOSNU I HERCEGOVINU NA EVROPSKOM JUDO KUPU U TURSKOJ



Na Evropskom judo kupu u Turskoj koji je okupio 457 takmičara iz 16 zemalja, mladi bh. sportisti Leona Čuljak i Anastasia Ignatkov, članice Judo kluba Borsa iz Mostara, ostvarili su veliki uspjeh za reprezentaciju Bosne i Hercegovine.

Leona Čuljak (-57 kg) i Anastasia Ignatkov (-70 kg) osvojile su srebrene medalje!

Čestitke.

## MEDALJE ZA BH. JUDISTE NA EVROPSKOM KUPU ZA JUNIORE I JUNIORKE U SKOPLJU

Dvanaest predstavnika iz Bosne i Hercegovine na Evropskom judo kupu u Skoplju, osvojilo je ukupno 4 medalje:

Zlato: Korina Džidić (-70 kg);  
Bronze: Rino Vrljić (+100 kg), Sofija Pajić (-78 kg), Johanna Elisabeth Klinger (-78 kg).

Odlične nastupe imali su i Adrian Đurđević i Hrvoje Knezović s 5. mjestima te Una Micić sa 7. mjestom. Bravo za sve predstavnike BiH i čestitke!



## USPJEH JUNIORSKE JUDO REPREZENTACIJE BIH NA AZIJSKOM JUNIORSKOM KUPU U AMMANU



Na judo kupu u Amanu nastupile su reprezentacije 14 zemalja, a bh. natjecatelji su ostvarili iznimne rezultate: Rino Vrljić (+100 kg), 1. mjesto; Johanna Elisabeth Klinger (-78 kg), 1. mjesto; Korina Džidić (-70 kg), 1. mjesto.

Ukupno osvojene tri zlatne medalje donijele su juniorskoj reprezentaciji Bosne i Hercegovine 3. mjesto u poretku nacija, odmah iza Hong Konga i Saudijske Arabije. Značaj postignutih rezultata na službenom IJF turniru predstavlja dodatni dokaz da se bh. judo može ravnopravno natjecati s

etabliranim azijskim judo velesilama. Ovim se BiH snažno pozicionirala u međunarodnom judo sustavu i stekla dodatne bodove te iskustvo važno za daljnji razvoj mladih sportista, što je takođe značajno za ukupni sport u BiH, budući da potvrđuje kvalitetan rad sa mlađim uzrastima te otvara put ka budućim uspjesima na europskoj i svjetskoj sceni.

## SKI TIM BIH ODLIČAN U JUŽNOJ AMERICI



Pripreme i prve FIS trke u Čileu donijele su sjajan početak sezone za naše alpske skijaše! Anur Mehić, Marko Šljivić i Dajra Duraković pokazali su zavidnu formu i sjajne rezultate.

Anur Mehić (16) – Drugo mjesto u seniorskoj slalom utrci i zlato u U18 konkurenciji, te dvostruko srebro u veleslalomu U18! Marko Šljivić – seniorski reprezentativac BiH i ukupni pobjednik jedne od FIS utrka, u sklopu priprema za Zimske olimpijske igre! Dajra Duraković – postavila dobre temelje za nastavak sezone u Evropi. Čestitke takmičarima, trenerima, klubovima i Skijaškom savezu BiH!

## VANJA MIRALEM NAPRAVIO VELIKI KORAK ZA BOSANSKOHERCEGOVAČKI GOLF NA VENICE OPEN 2025



Na međunarodnom juniorskom turniru Venice Open 2025, Vanja je ostvario fantastičan uspjeh osvojivši drugo mjesto u kategoriji Boys 13! Turnir je okupio više od 300 mladih golfera iz 35 zemalja svijeta. Vanja je tokom tri dana pokazao izvanrednu igru:

- Dan 1: +4; Dan 2: -2; Dan 3: Par (E)

Sa ukupnim rezultatom +2 (218 udaraca), Vanja je stigao do svog najvećeg uspjeha do sada, te izborio plasman na US Kids Golf 2026 – najveći juniorski golf događaj na svijetu! Čestitke na ovom velikom i važnom koraku za Vanju i njegovu porodicu, Golf klub Sarajevo, a prije svega i Golf savez Bosne i Hercegovine. BiH ima mlade talente koji stoje rame uz rame sa najboljima u Evropi i svijetu!

## BOSANSKOHERCEGOVAČKI RAGBISTI NA EUROPSKOM PRVENSTVU

U periodu od 17. do 20. jula u Budimpešti, Mađarska bila je domaćin Europskog prvenstva za U18 selekcije u okviru grupe Trophy II. Iako podmlaćena ekipa u sastavu: Konjic Ajas, Suljić Eldin, Direk Husein, Šišić David, Baručija Samed, Zovko Erik, Ekinović Jasmin, Zečević Adian, Suljić Aldin, Golub Kenan, Arnautović Malik i Smajić Tibor, pokazala je zavidan nivo napretka u igri te pokazala da se u budućem periodu može računati na ove mladiće kao okosnicu U18 reprezentacije i seniorske reprezentacije. BiH je zabilježila pobjedu nad selekcijom Srbije, te zauzela 5. poziciju. Stručni štab selekcije su činili: Haris Topalović, Almedin Buljubašić, Dino Muslić, Goran Zovko i Mirza Oruč.



## POBJEDNICA PYRAMID CUP 2025: EMA BURGIĆ

Nakon vrhunske borbe i odličnog tenisa Ema Burgić pobjedila je Katarinu Kužmovu u velikom finalu Pyramid Cup 2025 u Visokom.

Mjesto gdje je prije bila močvara, deponija i razne nevolje danas je mjesto gdje se postižu najbolji rezultati, a "krivac" za Pyramid Cup 2025 je dr. Semir Osmanagić. On je zajedno sa Novakom Đokovićem prije tri godine svečano otvorio teniski teren u parku "Ravne 2".



Pehar, simbol bosanskih piramida, pobjednici je uručio predsjednik Olimpijskog komiteta BiH, akademik prof. dr. Izet Rađo.

Akademik Rađo čestitao je pobjednici i učesnicima, te istakao kako je dr. Osmanagić vizionar i čuvar duha naše prošlosti.

"On na najbolji mogući način pravi ambijent i promociju sporta gdje ova divna djeca uče izvrsnost, fair play i prijateljstvo, koje su demonstrirali Ema i sve druge igračice."

Video uručenja pehara pogledajte [OVDJE](#).

Video i foto: Visoko.co.ba i Neven.K

## BOSNA I HERCEGOVINA IMA SVJETSKOG PRVAKA U AEROMODELARSTVU



Na Svjetskom prvenstvu u Rumuniji, u blizini grada Salonta, Haris Jusufbašić, član Aerokluba „Izet Kurtalić“ Visoko, postao je šampion u klasi F1B – gumenjaci!

Ova pobjeda je ogroman poticaj za razvoj aeromodelarstva u našoj zemlji, a velike čestitke idu i obojici njegovih kolega Predragu Šarkinoviću i Milivoju Nediću iz Aerokluba Zenica.

Čestitke Harisu, njegovom klubu i Vazduhoplovnom savezu BiH.

# EU PROJEKTI

## SAFE HARBOUR - USPJEŠNIH ŠEST MJESECI IZA NAS



pozitivne saradnje u cilju zajedničkog jačanja mehanizama zaštite u evropskom sportu. Projekat je zvanično započeo u januaru 2025. godine sa prvim sastankom uživo održanim u Briselu (Belgija) 28. i 29. januara 2025. godine.

Ovaj sastanak je pružio vrijednu priliku partnerima da se sastanu uživo, usklade ciljeve projekta i započnu kolektivno promišljanje o izazovima zaštite u sportu. Od tada se redovno održavaju sastanci eksperata u projektu i mjesечni sastanci konzorcija, što omogućava partnerima da ostanu usklađeni, razjasne uloge i odgovornosti, prate napredak i osiguraju kontinuirani doprinos i zajedničku koordinaciju tokom implementacije projekta.

Strukturiran u tri faze, projekat SAFE HARBOUR počinje identifikacijom nedostataka, ključnih zainteresovanih strana i obrazaca kršenja zaštite. Zatim će se krenuti ka zajedničkom razvoju Evropskog okvira za odgovor – zajedničkog savjetodavnog alata usklađenog s globalnim standardima zaštite MOK-a, ali prilagođenog evropskom pravnom i institucionalnom kontekstu. U završnoj fazi, svaki NOK će prevesti okvir u prilagođenu nacionalnu strategiju i pružiti obuku svom rukovodstvu i sportskim savezima.

Konzorcij paralelno unapređuje tri ključne aktivnosti: pokrenut je GAP upitnik kako bi se identifikovale i dobre prakse i postojeći nedostaci u procedurama i sistemima evropskih NOK-ova i sportskih saveza za reagovanje na zabrinutosti i kršenja u vezi sa zaštitom. Odgovori se trenutno analiziraju i informisat će sveobuhvatni GAP izvještaj. Ova analiza takođe dopunjuje tekuće mapiranje ključnih zainteresovanih strana uključenih u zaštitu u sportskim i nesportskim sektorima, pomažući u razjašnjavanju uloga, odgovornosti i mehanizama saradnje unutar partnerskih zemalja.

Osim toga, konzorcij redovno provodi razmjene među kolegama, koje služe kao pripremni korak ka zajedničkom razvoju alata za klasifikaciju zabrinutosti i kršenja u vezi sa zaštitom u sportu. Projekat SAFE HARBOUR je također uspješno pokrenuo svoju web stranicu, platforme društvenih medija i bilten, što predstavlja značajan korak naprijed u naporima za popularizaciju i vidljivost. Osim toga, SAFE HARBOUR je već postigao značajnu vidljivost, a projekat je predstavljen na 54. Generalnoj skupštini EOC-a u februaru 2025. godine i na Samitu Olympism365 u junu 2025. godine. Ovi angažmani na visokom nivou ističu ključnu ulogu projekta u pružanju konkretnih smjernica i podrške NOC-ovima i federacijama. Sve u svemu, prvih šest mjeseci projekta SAFE HARBOUR pokazali su snagu predanog konzorcija i postavili čvrste temelje za predstojeći rad. Sljedeći sastanak projekta uživo planiran je za oktobar 2025. godine i bit će upotpunjeno redovnim online razmjenama. U budućnosti, kroz kontinuiranu saradnju i razmjenu stručnosti, konzorcij ima za cilj jačanje mehanizama zaštitnog odgovora širom Europe, tako da budu potpuno integrirani na svim nivoima, kroz pristupe usmjerene na sportiste, informirane o traumi i profesionalno podržane; shodno tome, postavljajući temelje za uspostavljanje Regionalnog centra za zaštitu MOK-a.

Tekst: EOC EU OFFICE - bilten za juli

Juni 2025. godine označava uspješno pređen put, prvih šest mjeseci projekta, SAFE HARBOUR. Šest mjeseci tokom kojih je konzorcij već postigao značajan napredak u nekoliko ključnih oblasti.

Od zvaničnog pokretanja projekta i objave na društvenim mrežama, redovnih online sastanaka, gdje je konzorcijum aktivno radio na prvim zadacima projekta do otvorene komunikacije i

## #BEACTIVE SA OK BIH | NAGRADNA IGRA



Pozivamo Vas da učestvujete u nagradnoj igri Olimpijskog komiteta BiH povodom Evropske sedmice sporta i obilježavanja 10. godišnjice kampanje #BeActive.

Olimpijski komitet BiH u okviru obilježavanja Evropske sedmice sporta vas poziva da učestvujete u #BeActive nagradnoj igri.

Upute za učešće u nagradnoj igri pogledajte na [OVOM LINKU](#).

Nagradna igra traje do 10.09.2025.  
Dobitnici će imati priliku da osvoje:

1. Bicikl
2. Role
3. Ruksak sa sklopivim štapovima za planinarenje
4. Sanke

Sretno!



23 - 30 September



# INTERVJU ENHAR MAHMIĆ I HAMZA ALIĆ

PRVA ZLATNA EYOF MEDALJA  
ZA BOSNU I HERCEGOVINU

**OK BiH: Enhare kako si se osjećao nakon prvog hica i nakon saznanja da si najbolji u svojoj kategoriji?**

**ENHAR MAHMIĆ:** Moj prvi hitac bio je i najduži hitac ovog takmičenja. Pobijedio sam u prvoj seriji sa ličnim rekordom 19.34 m. Upute i savjeti mog trenera prije takmičenja bili su da u prvom hicu idem na sve ili ništa kako bi dobrim hicem konkurenčiju psihološki uzdrmao. Zapravo plan, cilj i realizacija došli su na moje veliko zadovoljstvo.

**Sa Enharem u Skoplju bio je i njegov trener Hamza Alić, olimpijac, član IK OK BiH i predsjednik AK Zenica. OK BiH: Treneru kakav je bio Vaš osjećaj nakon bačene prve serije, a kako nakon što smo saznali da je Enhар osvojio zlato?**

**HAMZA ALIĆ:** Moj osjećaj nakon prve serije bio je toliko emotivan, bio sam baš presretan, krenulo je onako kako smo planirali i priželjkivali da bude... Utom momentu prvi, ali treba sačekati i izdržati do kraja. Zapravo nekoliko njih takmičara bili su spremni da bace daleko, spremni su i to se vidjelo...insistirao sam da Enhar bude spremna na svaki scenario, da čuva adrenalin i voljni momenat za dodatni odgovor ukoliko bi ga neko prebacio. Slušao je moje upute i do kraja bio fokusiran maksimalno, a kada je došao kraj takmičenja našoj sreći nije bilo kraja!

**OK BiH: Emotivno je zasigurno bilo i u domu Mahmića, kako su reagovali tvoji roditelji?**

**ENHAR MAHMIĆ:** U našoj porodici je bilo mnogo emocija. Moji roditelji su presretni i ponosni, a ja sam još sretniji što sam im mogao prirediti taj trenutak radosti.

**OK BiH: Koliko se Enhar pripremao za ovaj nastup, koliko je ozbiljno shvatio učešće na EYOF-u?**

**HAMZA ALIĆ:** Ja kao njegov trener sam radio na tome i sve podredio ovom takmičenju. Enhar je bio u potpunosti svjestan šta ga čeka, kakva je konkurencija. U stvari, nakon prošle sezone u finalu Evropskog prvenstva za mlađe juniore u Slovačkoj, Enhar je bio deseti i već tada smo se dogovorili da je EYOF velika šansa i da na tom takmičenju, ukoliko se sve posloži, trebamo osvojiti medalju.

**OK BiH: Kako su tekle pripreme za EYOF i koliko je potrebno "odvajanja", mislimo i na vrijeme i sve kako bi se postigao jedan ovakav rezultat?**

**ENHAR MAHMIĆ:** Pripreme za EYOF su tekle veoma dobro i disciplinovano. Moj trener Hamza Alić i ja radili smo vrijedno, morao sam biti disciplinovan svaki trenutak, usmjeriti svu energiju u trening i razmišljati svaku minutu o treningu. Bilo je potrebno dati sve od sebe, što se na kraju i isplatilo.

**OK BiH: Koliko je važna podrška Olimpijskog komiteta BiH za ovakve talente?**

**HAMZA ALIĆ:** Svaki vid podrške je veoma bitan pogotovo za uzrast Enharovih godina. Podrška koju OK BiH pruža je za svaku pohvalu i kao krovna kuća sporta mnogo znači.

**OK BiH: Koje je naredno takmičenje i da li se već pripremaš?**

**ENHAR MAHMIĆ:** Naredno takmičenje je u Tuzli, Ekipno prvenstvo za juniore 7. septembra 2025. godine i radujem se novom nastupu.

**OK BiH: Koliko je važno da su trener i sportista na istoj "valnoj dužini"? Koliko se mora biti strog, koja je granica onog strogog odnosa i onoga kada morate malo omekšati, jer ipak ovdje se radi o mlađim sportistima?**

**HAMZA ALIĆ:** Svakako da je važno, u stvari mnogo je bitan taj odnos da su trener i sportista na istoj talasnoj dužini, odličnu saradnju imamo i to tako mora biti. Enhар vrijedno radi i maksimalno se zalaže što dodatno olakšava našu saradnju... A to jesam li strog trener, mislim da nisam, ali želim jedno poštovanje, želim da sam taj autoritet koji ako trener nema jednostavno nema ni uspjeha.

**OK BiH: Zahvaljujemo vam na izdvojenom vremenu za intervju i još jednom čestitke na prvoj zlatnoj medalji osvojenoj na evropskim omladinskim olimpijskim festivalima za Bosnu i Hercegovinu. Želimo vam sreću i mnogo uspjeha u narednim sportskim podvizima!**



## ZAVIRITE U DRUŠTVENE MREŽE OK BiH (klikom na sliku)



10.4K • View insights

Boost post

atletskisavezbih was invited to be a collaborator but hasn't yet accepted.

193 2 11

Liked by taekwondosavezbih and others  
olimpijski\_komitet\_bih 🌟 Predstavljamo mlade sportiste BiH za XVIII ljetni EYOF Skoplje 2025! ☀️

olimpijski\_komitet\_bih

**NAGRADNA IGRA**  
OLIMPIJSKI KOMITET BIH  
**#BEACTIVE**

BRAVO #BIHTEAM

Čestitke Enharu, treneru Hamzi Aliću i Atletskom savezu BiH.

#BosnalHercegovina #EYOF2025 #Skoplje #Sport #ZajednoSnažniji #okbih

#BosnalHercegovina #EYOF2025 #Skoplje #Sport #ZajednoSnažniji #okbih

**NOĆ SE ZAVRŠILA ZLATNO**



Olimpijski komitet Bosne i Hercegovine is with @city\_of\_sarajevo and 2 others at Gradska Vijecnica Sarajevo.


Aug 4 · 1

Grad Sarajevo nastavlja saradnju sa OK BiH kao krovnom institucijom bh. olimpi... See more



**OK BiH i Atletski savez BiH potpisali Ugovor za razvoj državne sportsk...**

AD SARAJEVO CITY OF SARAJEVO




OK BiH i Atletski savez BiH potpisali Ugovor z...

8 views · 13 days ago



SEMINAR SPORTSKE MEDICINE 2025 „Spor...

17 views · 2 weeks ago




SEMINAR SPORTSKE MEDICINE 2025 „Spor...

41 views · 2 weeks ago



SEMINAR SPORTSKE MEDICINE 2025 „Spor...

62 views · 2 weeks ago



SEMINAR SPORTSKE MEDICINE 2025 „Spor...

SEMINAR SPORTSKE

Pratite nas na društvenim mrežama:  
(klikom na ikone)



©2025. Olimpijski komitet Bosne i Hercegovine.

Sva prava zadržana.

[www.okbih.ba](http://www.okbih.ba)

Specijalnu zahvalnost dugujemo sponzorima i partnerima OK BiH.  
Klikom na logo posjetite njihove oficijelne stranice.



Moja priča.

